

О Послание цико Тит

Поздрав

1 ¹ О Павле, е Девлескоро слуга хем апостоли е Исусе Христоскоро, според и вера таро е Девлескере избириме хем о пеџариба е чачипаскоро, која тано според о девлипа, ² ки надеж баши вечно живото, со англедер о вечна времена ветинѓа о Девел, Кој на ховавела, ³ а ко пло време јавинѓа Пло Слово преку проповед, сој манге тано доверимо манге според и заповед е Девлескири, амаро Спасители – ⁴ цико Тит, о чачикано чедо, е заедничко веракоро: о благодат, о милост хем о мир таро Девел о Дат хем о Господари о Исус Христос, амаро Спасители.

Сар ваљани те овен о старешине

⁵ Одолеске мукхљумтут ко Крит, за да те средине о несовршимо хем баши те постајне старешине ко са о дизја, сар со наредујнѓум туке; ⁶ ако тано некој непорочно, ром јеке ромнакоро, ако исиле чхаве кој верујнена, кој нае тане обвиниме баши румиме буќа или непокорност; ⁷ соске окова сој одговорно сар Девлескоро кхер со водинела требела те овел непорочно: на само пес те дикхел, на хољамо, на пијанџија, на тепачи, на алчно баши нечесно те зарадинел, ⁸ него гостољубливо, амал е шукарипаске, гоѓавер, праведно, свето, воздржинелапе, ⁹ кој иќерелापес цврсто баши о верно слово, согласно е наукаја, за да те шај хем те опоменинел ки саста наука хем те ваќерел оленгере грешке околнге кој противиненапес.

Иси бут со ќерена лафи ко чучо хем ховавне

¹⁰ Уствари, иси бут непокорна, хем со ќерена лафи ко чучо хем ховавне, особено таро обрезање, ¹¹ каскере требела те пханденпес о муја ленгере, соске ола баши нечесно те зарадинен растуринана цела кхера, сикавенален одова со на требела. ¹² Јек олендар, оленгоро сопствено пророко, исиле ваќердо: ‘О Критјајна тале секогаш ховавне, билачхе свејра, мрзлива хем мангена превише те хан!’

¹³ Акава сведоштво тано чачикано; одолеске акоштут ленцар оштро, за да те овен састе ки вера, ¹⁴ за да тена ден внимание е јудејско парамисенге хем о заповедиа е манушенгере кој ираненапес таро чачипе.

¹⁵ Баши о чиста сај тано чисто; а баши окола кој тане нечиста хем кој на верујнена, ништо нае тано чисто, него мелале тане оленгоро о разум хем и совест. ¹⁶ Исповединена дека пенџарена е Девле, ама одречиненапес е делонџар, сар одвратна хем непослушна хем неспособна баши саво хем те овел шукар дело.

Сар ваљани те овен

2 ¹ А ту ваќер баши окова со сложинелапес е састе наукаја: ² о пхуре те овен трезвена, чесна, гоѓавера, састе ки вера, ко мангипе, ко трпение; ³ исто аѓар о попхуре џувља те понашиненпес сар со бешела е светиенге, тена клеветинен, тена предајненпес бут ки мол, него те овен учителке баши шукарипа, ⁴ за да те сикавен е терне џувлен те мангенлен пумаре ромен хем пумаре чхавен, ⁵ те овен гоѓавера, чиста, шукар домакице, покорна пумаре роменге, за да мате хулинелпес е Девлескоро Слово.

⁶ Исто аѓар, опоменин е тернен те овен сар со ваљани гоѓавера, ⁷ дејбаја ту тут ко са сар пример баши шукар дејља, ки наука – бизо румиме буќа, достоинство, ⁸ састо хем бизо те фалинел дисаво лафи, за да те лаџал секова противнико, тена овеле со те ваќерел билачхе баши аменге.

⁹ Опоменин е робон, за да те покориненпес пумаре господаренге, те на ачховен те угодинен ленге, тена ваќерен ленге против, ¹⁰ тена чорен, него те сикавен пли шукар верност, та те украсинен ко са и наука амаре Спасителскири хем Девел.

Е Девлескири благодат анела спасение

¹¹ Соске јавинѓапес е Девлескири благодат, која анела спасение баши о са о мануша, ¹² која воспитинеламен те откажинамен таро бизодевлипа хем о светска похоте, те живина гоѓавер, праведно хем девликано ко авдисутно веко, ¹³ аџиќерибаја и блажено надеж хем о славно јавиба амаре Семоќно Девлескири хем Спасители, о Исус Христос, ¹⁴ Кој денѓапес Коркори Пес место аменге, за да те избавинеламен таро секова безаконие хем те очистинел баши Песке сопствено народо, кој припадинела Олеске, кој прастана баши шукар дејља.

¹⁵ Ваќерле акава хем опоменин, хем викин ленге целосно властеја, никој тена презиринелтут!

Спасинѓамен пали Пли милост

З ¹ Потсетинлен те покориненпес е началствонге хем е властенге, те овен послушна, те овен готова баши секова шукар дело, ² никас тена хулинен, тена препириненпес, те овен мирна, те сикавен секова кроткост ко са о мануша.

³ Соске хем аменда сијем сине некогаш бизогоѓакере, на покоринајамен сине, нашавде таро право друмо, робиа баши разно страстенге хем задоволствиа, живибаја ко билачхипе хем завист, мрзиме хем мрзинајамен сине јек јавереја.

⁴ Ама кога јавингепе: о шукарипа хем о мангипе е манушенге е Девлескоро, амаро Спасители, ⁵ спасинѓамен на упри основа е праведно делонгири со кергемлен амен, него пали Пли милост преку тхојбе е невебијанибаскоро хем со ќерѓамен неве о Свети Дух, ⁶ Кас со изобилно чхорѓа упри аменде преку о Исус Христос, амаро Спасители, ⁷ та оправдиме преку Олескири благодат те ова наследниќа според и надеж таро вечно живото. ⁸ Верно тано одова слово, хем мангава акава те иќереле цврсто; хем окола, кој верујнена ко Девел те грижиненпес те џан англал ко шукар дејља. Одовај тано шукар хем корисно баши о мануша.

Избегинлен акала буќа

⁹ А избегинлен: о глупава пучиба, о родословие, о расправие, хем о препирке пало однос е Законескере, соске тане некорисна хем суетна.

¹⁰ Избегин мануш со банге верујнела, пало прво хем дујто опомена, ¹¹ џандипаја дека асавко мануш иранѓапес хем дека грешинела, та осудинѓапес коркори пес.

Те овен прва ко шукар дејља

¹² Кога ка бичхававлен ки туте е Артема или о Тихик, сиѓар те аве ки манде ко Никопол, соске решинѓум те накхавав о јевен одори! ¹³ Грижливо снабдинлен баши друмоске о правнико о Зина хем о Аполос, за да те овелен са со требела

ленге! ¹⁴ Ама хем амаре те сикљовен те овен прва ко шукар дејља, коте сој тано одова чаче потребно, за да мате овен бизо плоди.

¹⁵ Поздравиненатут сарине, кој тане манцар. Поздравин околен, кој мангенамен ки вера. И благодат сариненцар туменцар. Амин!